

¡BOMBA!

Ya vienen tiempos mejores,
Pemex debe mucho menos;
¿será que estén bien serenos
todos sus proveedores?



K'uintsil

Jueves 5 de febrero de 2026

CAMPECHE · YUCATÁN · QUINTANA ROO · AÑO 11 · NÚMERO 2657 · www.lajornadamaya.mx



Oochel Ap

OPS tu k'a'aytaj sajbe'entsil yóok'lal u pak'be'en k'oja'anil sáarampyoon tu lu'umil Américas

Umúuch'kabil Organización Panamericana de la Salud (OPS) tu k'a'aytaj yaan sajbe'entsil yóok'olal u k'oja'anil sáarampyoon tu lu'umil Américas, le beetik tu páayt'antaj noj lu'umo'ob ti'al u maas jach kaláanta'al kaaj ti' le pak'be'en k'oja'anila, beyxan ti'al u báakunaarta'al yéetel u séeb péek máak kéen tsa'ayak ti', ti'al u xo'ot'ol yéetel u kaláanta'al máaxo'ob séeb je'el u tsa'ayale'.

Sajbe'entsile, k'a'ayta'ab te'el k'iino'oba, ts'o'oke' ku chiikbesik láayli' u tsa'ayal le k'oja'anila' ichil u kajnáalilo'ob jejeláas lu'umo'ob te'elo'. Ts'o'oke' maaschaj u bin u ya'abtal tu ja'abil 2025, keetel yéetel le ts'ook jo'op'éel ja'abo'ob aantes, ts'o'oke' je'ex u yila'alo', láayli' beey kun bin u ya'abta'al ti'al 2026.

OPSe' ku k'áatik ka mu'uk'ankúunsa'ak u kaláanta'al kaaj yéetel xan u yila'al máax ti' ku tsa'ayal ti'al u xo'ot'ol ti', je'el bix xan u séeb xak'alta'al ti' labóoratooryoo wa leti'e' k'oja'anilo', beyxan u báakunarta'al máak.

K'a'aytaje' beeta'ab tu jo'oloy yanak u tse'elel ti' Canadá u k'aaba' noj lu'um tu'ux mina'an sáarampyoon, ts'o'oke' táan u yila'ale' Estados Unidos yéetel Méxicoe' láayli' ti' ku bino'obi'. U jala'achil noj lu'umo'obe' tu k'aatajo'ob ka ts'a'abak uláak' ka'ap'éel winalo'ob ti'al u kaxik u xu'ulsiko'ob le k'oja'anil táan u bin u pa'ak'alo'. Kex beyo', Donald Trump, u jala'achil Estados Unidos' tu jets'aj u jóok'ol ti' u mola'yil Organización Mundial de la Salud, tu'ux méek'a'an OPS.

Tu ja'abil 2025e', yanchaj 14 mil 891 máax ti' jéets' tsa'ay le k'oja'anilo', ti' lelo'obo' yanchaj 29 máak kiim ti' 13 u p'éel noj lu'umo'ob. Noj lu'umo'ob tu'ux yanchaj máaxo'ob k'oja'anchaje' leti' lelo'oba: Argentina (36), Belice (44), Bolivia (597), Brasil (38), Canadá (5 mil 436 u túul máak, yéetel ka'atúul kiimij), Costa Rica (juntúul k'oja'anchajij), El Salvador (juntúul k'oja'anchajij), Estados Unidos (2 mil 242 u túul máax tsa'ay ti' yéetel óoxtuu kiimij), Guatemala (juntúul k'oja'anchajij), México (6 mil 428 kaaso'ob yéetel 24 kimeno'ob), Paraguay (49), Perú (5) yéetel Uruguay (13 kaaso'ob). Le beyka'ajo' ku chiikbesik ya'abchaj 32 u téenal le beyka'aj k'oja'an máako'ob yanchaj tu ja'abil 2024, tumen chéen 466 kaaso'ob ojéelta'ab yanchajij.